

寶前兩谿志略

寶前兩溪志畧卷六

歸安吳玉樹靈圃氏編輯

祠祀

神之能禦災捍患祀之以報功也前賢往哲祀之以崇德也先王之所以合幽明而展誠敬其斯謂乎誌祠祀

后羿祠

在射村不知期自何代明萬厯庚戌王西陵重建改名圓通庵

吳季子祠

在射村五代時裔孫吳剪由山陰縣奉父母避兵徙

寶六

一 嘉業堂校刊

居射村官後周宣教郎立祠以祀宋淳祐閒裔孫吳文杲重修并置產以贍守祠明裔孫吳宗義重脩後吳龍復修葺之春秋二仲月郡守檄縣致祭學政行文給守祠生衣巾奉祀嘉慶六年詳請防護現在裔孫申縣充當守祠主理祭器

宋淳祐九年章斯猶建祠碑記

吳文杲捨地碑記

案明萬厯閒祠為里民任氏侵佔將宋淳祐二碑燬棄吳氏控官得

復其地

明胡鐸重脩季子祠記

延陵季子古賢人也流風所及百世下莫不仰止湖治距東南一舍許吳氏世居其閒厥地號曰西吳南

吳而西吳土地祠故老相傳爲季子第一一作墓宋淳祐

閒吳文晁者以苗裔故嘗發私帑購士民徐氏地蕩一十六畝有奇以贍守祠厯元至國朝祠就圯廢成化閒安素翁璋過而歎曰祠以依神今若此神將安依由是靡廩聚材諏日肇役腐者新之卑者崇之隘者闢之堂宇門廡竦然改觀祠有配像或以爲東魯徐君蓋仍其舊而莫敢廢也旣而安素之子九淵君復加葺治題其額曰西吳季子之廟余濫官于滁適九淵君爲之簿索余爲文將紀諸石余惟事焉合義俗所宜從祠而非淫法所不廢狄梁公毀淫祠而獨存之良有以也且聞諸其鄉水旱疾疫必禱禱必應

寶六

二

而祠之前松楊大可十圍余以是知神之靈千載不泯也吳氏世崇其廟豈直私親乎哉

吳時亮復西吳季子廟祭記

余遊延陵謁先賢季子祠祠之額爲嘉賢廟乃高皇帝御賜後十年余治兵常鎮駐澄江其地有申浦者季子墓在焉至聖所題十字碑屹然聳峙爲千百年來遺跡每爲留連不忍去者久之乃吳興之射村西吳祠亦相傳爲季子墓此何說歟惟是高風至德千秋仰止先儒謂其才近伯夷讓如泰伯如春秋左傳家語史記諸書所載百世下如見其人況三吳故地神所往來陟降者哉然則季子之神雖家戶戶祝可

也而屬在苗裔能不竭誠致敬以奉之遠弗可考考
其近者後周有剪祖立建宋有文果捨地我明有安
素祖之脩復西園祖之葺治嗣後爲無賴者所侵蝕
幾不可詰而一人倡義具族同心遂使廟貌聿新蒸
嘗載肅非神有靈孰啟之衷而贊之決耶憶吾先世
代有顯者明興以來獨以孝義甲諸大姓是猶延陵
之風焉邇來生齒日繁生計日拙吾慮孝義之不保
其終也又何敢遠稱讓國高風貽羞往哲哉願奉祀
者世世相與勗諸崇正四年辛未仲秋裔孫時亮

吳福詩

至德相傳直到今隱微偏是人人深君臣父子兼兄
弟不負天倫不負心

寶六

三

國朝學政李際期守祠祭器行府檄

恭惟延陵夫子審樂辨風參夔伶之妙契知人達政
蘊康阜之宏猷倡讓位以化異日之爭傳不識其宗
臣憂國解佩劍以明當年之志史誤以爲俠士踐然
蓋遠紹太伯之至德下軼子臧之高風宜至聖之表
其碑也吳時官准以衣巾奉裡祀一應祭田祭器該
府行縣簿錄飭守以昭恭敬繳

太守吳綺謁西吳季子祠詩

西吳亦是勾吳地魂氣何嫌之此都萬古交情留短
劍百年祀典寓生芻庭遺檜柏滋蔥鬱門有溪山擁

畫圖我在廣陵分一派溯洄雖遠不模糊

陽夏侯祠

在前溪鳳林祀漢陳豨明正統乙丑里人沈氏重建
天啟間僧覺堂募修

祠有銅鐘明嘉靖間再鑄不鳴有里人捨金環合鑄
乃成其聲宏遠勒碑紀其事崇正間爲盜所劫去至
鳳潭鐘忽躍入水中盜懼而逸

明金梅社田碑記

鳳林土地廟迺漢將軍陳豨鍾靈之地禦災捍害誠
一方之保障也然非有田里以裕其基抑何以延廟
貌于不毀哉本廟旁有地田一邱世守不廢後因里

寶六

四

有木橋歲久而頽僧明璫見而患之奮然充拓石橋
之志隱君張石泉慨施以爲眾人倡後不免虧一簣
之功于是明璫不私所有逕鬻田以終其事田雖廢
而橋則成僧之心亦無憾矣時嘉靖辛丑里有善士
吳潮念吾鄉之所賴者存乎神神之所依者存乎廟
而廟之所資者在乎田由是矢心竭力勸募于鄉以
求復其田鄉人聞之莫不感焉不日復獲其田以歸
于廟名之曰社田使僧無不給之憂廟垂不朽之業
而吾鄉亦獲祐于無疆也里人謁余爲記爰書其概
于石

吳時亮鳳林土地廟碑記

鳳林禪院在予里之西南隅相傳爲漢陽夏侯陳將軍豨封此爲土穀神故稱土地廟云廟不知劫自何代但其後殿梁上題額尙存正統乙丑重整至于今蓋二百三十餘年矣神威顯赫爲一方保障予成童時卽隨先大夫百歲翁瞻禮此間得聞同里先達嚴景苕公事神最虔恪夢神賜以錦帳是年果登第卽釋褐爲進士其名次適與夢相符神之靈驗類如此己未予通籍後宦遊京師住僧覺堂廓然有大志請于先大夫廣而新之闢後殿之前址築三楹爲正殿移神棲于其中而後殿則供釋迦大士諸像立山門增置旁舍一切長生燈油田以及什物器皿次第脩

寶六

五

舉犁然完善而又出其餘力勑夏字圩之禪慧寺菁山之經堂庵皆覺堂一人締造之力而其徒養愚贊襄以有成者也故鳳林開山之功實以覺堂爲稱首自後予致政家居廟中事無大小靡不力爲護持又捨田以爲香燭之需而養愚之徒若孫悄然德鑑蓮芳輩亦皆勤敏恪慎梵唄鐘磬晨昏弗綴至于撐持禪林迄今猶無改舊觀者則蓮芳之功尤多焉數十年來覺堂年老而逝養愚悄然相繼淪沒德鑑亦病不能起蓮芳最後年逾六十予年九十有三則衰且耄可知矣一日者蓮芳進而請曰鳳林禪院之賴公庇廕也垂六十年公今壽躋期頤而蓮亦日以衰邁

恐後之嗣者不能恪守清規俾先祖覺堂拮据刼造
之艱一旦廢墮用是惕焉茲懼願公賜一言以勒之
石以垂不朽并將田畝器具誌之碑左昭世守焉予
深嘉其志遂濡墨而記之

國朝吳靜詩

將軍百戰勳名盛代北長埋萬古冤借問空庭誰屬
耳漢家廷尉少平反

吳穀北行憶鳳林舊遊詩

鳳林春賽夕陽邊禪室頻來借榻眠惆悵昔遊難再
問靈祠簫鼓自年年

吳芳錡鳳林禪院訪王東廬詩

寶六

六

桑柘連村暗聞鐘到寺門斷橋人跡少籬落鳥聲喧
把酒無多酌題詩好細論只緣歸路近小住話黃昏

徐公祠

在寶溪西庄田祀東魯徐君

文昌閣

舊名魁光閣

在前溪明萬厓閒吳世治捨地刼建上供梓潼帝君
下供漢壽亭侯像 國朝乾隆閒重脩前後兩殿增
素總管祠

清溪南注前溪西環二水會合閣當其中菁埭諸峯
俯仰揖拜于几席閒兩溪閒一勝景也

景

里人稱溪閣
晚眺列入勝

國朝吳允詩

小閣憑欄思浩然窗開遠入暮秋天遙山飛翠晴猶
濕野墅眠雲雨亦妍禾黍青黃迷古渡檣帆隱見轉
前川何來金鼓聞喧笑可是農家賽社還

關帝祠

在通輿橋北岸明洪武間建 國朝乾隆間陸暢敘
同里人重建

總管堂

在通輿橋北關帝祠旁祀護國隨糧王金總管
明李祐睦州建昌祠碑記元季搆兵李文忠平之有
人馬旌旄擁從前後空中語曰金元七總管也李公

寶六

七

上聞敕封利濟侯立祠祀之

案神蘇郡人金姓名元七見庚巳編聞之巫祝家云
神元季人金姓名萬一封護國隨糧王子元六元七
封順濟侯利濟侯

計大明王祠

在前邱神姓計爲前溪土穀祠晉時敕封清溪里域
咸平侯妻息氏封眞靜夫人每歲八月十三日爲神
誕里人以麥粉作犧牲狀以祀

太均殿

祀宋兵馬都監陸圭神歸安人熙寧間以祖廕補官
尋調都監宣和時嘗發私帑賑饑適方臘弄兵麀戰

而卒遂爲潮神紹興閒海濤衝激江岸見神役陰兵潮遂平嘉定閒飛蝗蔽天神見雲端驅之淳祐閒錢塘大決神與三女揚旗空中浮石江面堤遂築帥臣徐桌以其事聞于朝賜廟協順爵曰廣靈侯妻姚氏封花錦夫人三女封顯濟永濟通濟夫人宋文及翁作廟記今里俗爲宜男之神祠中有如姑射神者提攜孩稚幾十數士女祈子者輻湊而來或竊神鞋應則倍謝產婦彌月咸祭之謂神能保產多乳或以大碗覆于神前爲乞乳里俗或有生子女繼爲神裔改呼陸某者足爲一笑正月十一日爲神誕祭賽如市又清明後一日俗呼爲黃明日其祭賽尤紛紛焉

寶六

八

案俗稱三濟夫人爲三殿太均未詳其義或謂均當作君或謂神靈顯應正直均平故稱

一在寶溪東嶽行宮西明景泰閒建 國朝乾隆閒住僧募眾重建

一在前溪法華庵西 國朝乾隆閒吳氏重建

費公祠

在射村祀宋學士文端公費若今廢

戴公祠

在射村鹿苑寺祀宋歸安縣令戴融公于天聖四年以太常博士知歸安縣事蒞任末期大治先是邑民困于茶賦公乃籍數之多少第戶之豐乏審地而均

其課民因以蘇崇禮長壽二鄉今射村以西屬長壽

俱屬崇禮案府縣各志名宦傳俱作民多澤居不

務稼穡公以禮法諭之遂革舊染未幾內召二鄉德

之立祠以祀案府李志名宦傳作戴融職官表并縣

州顏魯公抒山詩云
旁瞻戴顒路是也

府勞志戴公生祠碑宋都官郎中張先撰

縣志立祠射村永福寺

案永福寺當作永興寺

胡公祠

在射村祀宋胡咸并廣西帥胡舜陟今廢

宋胡舜陟丐祠射村感皇恩詞

寶六

乞得夢中身歸棲雲水始覺精神自家底峭帆輕棹

時與白鷗遊戲畏途都不管風波起 光景如梭人

生浮靡百歲何妨盡沈醉臥龍多事謾說三分奇計

算來爭似我長昏睡此詞漁隱叢話吳興藝文補選

為舜陟子胡仔作閔元
衢復辨為黃氏之誤

案胡咸本績溪人字誠甫游太學十餘年謝病歸其

子舜陟舜舉相躡高第從典大州累贈朝散郎建炎

四年八月辛亥以疾卒于家年八十一子四舜陟舜

俞舜申舜舉紹興元年五月丁未葬于安吉縣之原

見汪藻胡君墓誌銘舜陟詳人物

吳氏家廟

在前邱東塢明初吳璋刵建于前溪北岸嘉靖間吳龍遷建今所中爲如在堂永思堂東爲綏祿堂西爲衍慶堂共二十九楹崇正間吳世裕吳時亮相繼增聖諭軒東西廂房左右碑亭 國朝雍正間增建愛敬堂五楹傳經樓五楹蔣瑤朱國楨俱有記

明孫存詩

道場山前發雙棹法華庵東見新廟廟貌有嚴清風揚司空寫出吳君孝吳君甚孝翁甚慈大書堂額永其思永思堂下種青柏安素墳前生紫芝紫芝眉宇投閒早前邱卽是蓬萊島麟兒頭角兩崢嶸蘭孫手掌多文藻君撫兒孫更慕親每推親意及宗人有田

寶六

十

供祀亦周急延陵以下皆欣欣已有雄文勒金石君之雲初保無斃春雨秋霜歲月深種來柏樹應千尺吳龍永思堂落成詩

一生拙宦苦奔馳俯仰徒懷烏鳥私合族有心成好會明裡無地展哀思親栽松柏森新廟遠紀勳庸續舊碑瞻拜豈能忘對越容聲恍惚足追惟

